

Broj: 03-02-354/2024
Sarajevo, 12.03.2024. godine

PARLAMENT FEDERACIJE
BOSNE I HERCEGOVINE

- Predstavnički dom -
gđa. Mirjana Marinković - Lepić, predsjedavajuća

- Dom naroda -
gosp. Tomislav Martinović, predsjedavajući

Poštovani,

U skladu sa članom 40. stav (5) Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16), a u vezi sa članom 206. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i članom 203. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), **radi razmatranja i donošenja, dostavljam Vam PRIJEDLOG ODLUKE O PRIHVATANJU ZADUŽENJA PO UGOVORU O FINANSIRANJU IZMEĐU BOSNE I HERCEGOVINE I EVROPSKE INVESTICIJSKE BANKE ZA REALIZACIJU PROJEKTA VJETROELEKTRANA VLAŠIĆ**, koji je utvrdila Vlada Federacije Bosne i Hercegovine na 28. sjednici, održanoj 27.02.2024. godine.

Prijedlog odluke se dostavlja na službenim jezicima i pismima Federacije Bosne i Hercegovine.

Također, u prilogu Vam dostavljam i sljedeću dokumentaciju:

- Informacija o kreditu EIB za finansiranje Projekta Vjetroelektrane Vlašić
- Ugovor o finansiranju zaključen između EIB-a i Bosne i Hercegovine

S poštovanjem,

PREMIJER

Nermin Nikšić



Prilog u printanoj i elektronskoj formi (CD):

- Prijedlog odluke na bosanskom jeziku i
- gore navedena dokumentacija

Co: Federalno ministarstvo finansija-
Federalno ministarstvo financija
gosp. Toni Kraljević, ministar

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ODLUKA

**O PRIHVATANJU ZADUŽENJA PO UGOVORU O FINANSIRANJU IZMEĐU BOSNE I
HERCEGOVINE I EVROPSKE INVESTICIJSKE BANKE ZA REALIZACIJU
PROJEKTA VJETROELEKTRANA VLAŠIĆ**

Sarajevo, februar 2024. godine

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16) Predstavnički dom Parlamenta Federacije Bosne i Hercegovine na _____ sjednici održanoj _____ godine i Dom naroda Parlamenta Federacije Bosne i Hercegovine na _____ sjednici održanoj _____ godine d o n o s i

ODLUKU

O PRIHVATANJU ZADUŽENJA PO UGOVORU O FINANSIRANJU IZMEĐU BOSNE I HERCEGOVINE I EVROPSKE INVESTICIJSKE BANKE ZA REALIZACIJU PROJEKTA VJETROELEKTRANA VLAŠIĆ

I.

Prihvata se zaduženje Federacije Bosne i Hercegovine (u daljem tekstu: Federacija BiH) po Ugovoru o finansiranju između Evropske investicijske banke (u daljem tekstu: Banka) i Bosne i Hercegovine (u daljem tekstu: BiH) za realizaciju Projekta Vjetroelektrana Vlašić (u daljem tekstu: Projekat) u iznosu do 36.000.000,00 EUR-a.

II.

Sredstva zajma iz tačke I. ove Odluke koristit će se za finansiranje izgradnje vjetroelektrane do 50 MW na visoravni Vlašić u Srednjobosanskom kantonu. Projekat obuhvata:

- isporuku, instalaciju i puštanje u pogon vjetroagregata snage do 50 MW,
- izgradnju temelja, isporuku i ugradnju električne opreme i transformatora za vjetroagregate i tornjeve,
- izgradnju podstanice visokog napona, uključujući nadzemni dalekovod, transformatore, ožičenje, telekomunikacijsku opremu i skladišni prostor,
- izgradnju pristupnih puteva, kablovskih tranšea, montažnog prostora i platformi za dizalice i
- konsultantske usluge.

III.

Sredstva zajma iz tačke I. ove Odluke, odobravaju se Federaciji BiH pod sljedećim uslovima:

- iznos zajma.....36.000.000,00 EUR-a,
- rok otplate.....20 godina,
- grace period.....4 godine (uključen u rok otplate),
- kamatna stopa.....fiksna ili varijabilna i dogovara se prije isplate tranše,
- dospijeća.....polugodišnja rata u jednakim otplatama glavnice.

IV.

Potvrđuje se da je razmatrana dokumentacija prihvatljiva za Federaciju BiH, a posebno:

- Ugovor o finansiranju zaključen između Banke i BiH u Sarajevu 18. oktobra 2023. godine i u Luksemburgu 19. oktobra 2023. godine.

V.

Sredstva zajma iz tačke I. ove Odluke Federacija će prenijeti na osnovu zajma na Javno preduzeće Elektroprivreda Bosne i Hercegovine d.d. Sarajevo (u daljem tekstu: JP EPBiH), koje je krajnji korisnik i dužnik po ovom zaduženju.

U periodu implementacije Projekta, u budžetu Federacije nije potrebno osigurati finansijska sredstva za dodatno sufinansiranje Projekta.

VI.

Zadužuje se Federalno ministarstvo finansija da sa JP EPBiH usaglasi i sklopi odgovarajući Podugovor o zajmu kojim će, u svrhu redovne otplate, definirati uslove vraćanja sredstava koja se prenose na kreditnom osnovu.

VII.

Daje se saglasnost za zaključivanje Supsidijarnog sporazuma o zajmu između BiH i Federacije i Podugovora o zajmu između Federacije BiH i JP EPBiH za zajam iz tačke I. ove Odluke.

Za potpisivanje Supsidijarnog sporazuma i odgovarajućeg Podugovora o zajmu ovlašćuje se federalni ministar finansija.

VIII.

Za realizaciju ove Odluke i izvještavanje zadužuje se Federalno ministarstvo finansija i JP EPBiH, svako u okviru svoje nadležnosti.

IX.

Implementacija Ugovora iz tačke I. ove Odluke ne zahtijeva donošenje novih ili izmjenu postojećih zakona.

X.

Ova Odluka stupa na snagu narednog dana od dana objavljivanja u "Službenim novinama Federacije BiH".

O B R A Z L O Ž E N J E
PRIJEDLOGA ODLUKE O PRIHVATANJU ZADUŽENJA PO UGOVORU O
FINANSIRANJU IZMEĐU BOSNE I HERCEGOVINE I EVROPSKE INVESTICIJSKE
BANKE ZA REALIZACIJU PROJEKTA VJETROELEKTRANA VLAŠIĆ

I - Pravni osnov

Pravni osnov za donošenje ove Odluke sadržan je u članu 40. stav 4. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja nacrtu kreditnog sporazuma i utvrđivanja Prijedloga odluke, istu dostavlja Parlamentu Federacije BiH na usvajanje. Ovakva izmjena zakona imala je za cilj pojednostavljenje procedure u donošenju odluka, tako da će Parlament Federacije BiH na ovaj način usvajati odluku, a ne potvrđivati ranije donesenu odluku Vlade Federacije BiH.

II - Razlozi za donošenje

Osnovni razlog za donošenje ove Odluke je zaduženje Federacije BiH po osnovu zajma kod Evropske investicijske banke za realizaciju Projekta Vjetroelektrana Vlašić.

Donošenjem ove Odluke stvara se osnov za potpisivanje Supsidijarnog sporazuma između Bosne i Hercegovine i Federacije Bosne i Hercegovine, kojim će se propisati uslovi za stavljanje na raspolaganje zajma Federaciji Bosne i Hercegovine, a koji će biti identični uslovima pod kojima Evropska investicijska banka odobrava zajam Bosni i Hercegovini. Federacija Bosne i Hercegovine će pod istim uslovima sredstva zajma proslijediti dalje JP EPBiH.

Sredstva zajma koristit će se za finansiranje izgradnje vjetroelektrane do 50 MW na visoravni Vlašić u Srednjobosanskom kantonu, otprilike 100 km sjeverozapadno od Sarajeva. Projekat obuhvata:

- isporuku, instalaciju i puštanje u pogon vjetroagregata snage do 50 MW,
- izgradnju temelja, isporuku i ugradnju električne opreme i transformatora za vjetroagregate i tornjeve,
- izgradnju podstanice visokog napona, uključujući nadzemni dalekovod, transformatore, ožičenje, telekomunikacijsku opremu i skladišni prostor,
- izgradnju pristupnih puteva, kablovskih tranšea, montažnog prostora i platformi za dizalice i
- konsultantske usluge.

III - Obrazloženje pojedinih tačaka

Tačka I. je nužna kako bi se prihvatilo zaduženje Federacije BiH kod Banke.

Tačkom II. potvrđuje se namjena utroška sredstava zajma.

Tačkom III. precizirani su uslovi zajma.

Tačkom IV. potvrđuje se da je razmatrana dokumentacija prihvatljiva za Federaciju BiH.

Tačkom V. se definira način implementacije Projekta, te da nije potrebno osigurati dodatna sredstva u budžetu Federacije za ovu namjenu.

Tačkom VI. se definira obaveza Federalnog ministarstva finansija da sa JP EPBIH usaglasi i sklopi odgovarajući Podugovor o zajmu.

Tačkom VII. daje se saglasnost za zaključivanje Supsidijarnog sporazuma s BiH i Podugovora o zajmu s JP EPBIH, te daje ovlaštenje federalnom ministru finansija da u ime Federacije potpiše iste.

Tačkom VIII. u okvirima nadležnosti definira se obaveza za realizaciju Odluke i izvještavanje.

Tačka IX. potvrđuje da za implementaciju Ugovora o finansiranju nije potrebno donijeti nove ili izmijeniti postojeće zakone.

Tačka X. propisuje stupanje na snagu ove Odluke.